

Band IV., Nr. 1044, Seite 99-101

Papst Innozenz IV. nimmt das Kloster Kirchberg unter seinen Schutz und bestätigt dessen sämtliche Besitzungen, Rechte und Freiheiten.

Lyon, 1245. Mai 20.

Innocentius episcopus, servus servorum dei, dilectis in Christo filiabus . . . priorisse ecclesie in Kylchberg eiusque sororibus, tam presentibus quam futuris, regularem vitam professis in perpetuum. Religiosam vitam eligentibus apostolicum convenit adesse presidium, ne forte cuiuslibet temeritatis incursus aut eas a proposito revocet, aut robur, quod absit, sacre religionis enervet. Eapropter, dilecte in Christo filie, vestris iustis postulationibus clementer annuimus et ecclesiam in Kylchberch, Constantiensis diocesis, in qua divino estis obsequio mancipate, sub beati Petri et nostra protectione suscipimus et presentis scripti privilegio communimus. In primis siquidem statuentes, ut ordo canonicus, qui secundum deum et beati Augustini regulam in eadem ecclesia institutus esse dinoscitur, perpetuis ibidem temporibus inviolabiliter observetur. Preterea quascumque possessiones, quecumque bona dicta ecclesia impresentiarum iuste ac canonice possidet, aut in futurum concessione pontificum, largitione regum vel principum, oblatione fidelium, seu aliis iustis modis prestante domino poterit adipisci, firma vobis et hiis que vobis successerint et illibata permaneant. In quibus hec propriis duximus exprimenda vocabulis: locum ipsum, in quo prefata ecclesia sita est, cum omnibus pertinentiis suis, cum pratis, vineis, terris, nemoribus, usuagiis et pascuis, in bosco et plano, in aquis et molendinis, in viis et semitis, et omnibus aliis libertatibus et immunitatibus suis. Sane novalium vestrorum, que propriis sumptibus colitis, de quibus aliquis hactenus non percepit, sive de vestrorum animalium nutrimentis nullus a vobis decimas exigere vel extorquere presumat. Liceat quoque vobis personas liberas et absolutas e seculo fugientes ad conversionem recipere et eas absque contradictione aliqua retinere. Prohibemus insuper, ut nulli sororum vestrarum post factam in ecclesia vestra professionem fas sit sine priorisse sue licentia, de eodem loco nisi artioris religionis obtentu discedere, discedentem vero absque communium litterarum vestrarum cautione nullus audeat retinere. Cum autem generale interdictum terre fuerit, liceat vobis clausis ianuis, exclusis excommunicatis et interdictis, non pulsatis campanis, suppressa voce, divina officia celebrare, dummodo causam non dederitis interdicto. Crisma vero, oleum sanctum, consecrationes altarium seu basilicarum, benedictiones monialium a diocesano suscipietis episcopo, si quidem catholicus fuerit et gratiam et communionem sacrosante

II

Romane sedis habuerit et ea vobis voluerit sine pravitate aliqua exhibere. Prohibemus insuper, ut infra fines parrochie vestre nullus sine assensu diocesani episcopi et vestro capellam seu oratorium de novo construere audeat, salvis privilegiis Romanorum pontificum. Ad hec novas et indebitas exactiones ab archiepiscopis, episcopis, archidiaconis seu decanis aliisque omnibus ecclesiasticis secularibusve personis a vobis omnino fieri prohibemus. Sepulturam quoque ipsius loci liberam esse decernimus, ut eorum devotioni et extreme voluntati, qui se illic sepeliri deliberaverint, nisi forte excommunicati vel interdicti sint aut eciam publice usurarii, nullus obsistat, salva tamen iustitia illarum ecclesiarum, a quibus mortuorum corpora assumuntur. Decimas preterea et possessiones ad ius ecclesiarum vestrarum spectantes, que a laicis detinentur, redimendi et legitime liberandi de manibus eorum et ad ecclesias, ad quas pertinent, revocandi libera sit vobis de nostra auctoritate facultas. Obeunte vero te, nunc eiusdem loci priorissa, vel earum aliqua, que tibi successerit, nulla ibidem qualibet supreptionis astutia seu violentia preponatur, nisi quam sorores communi consensu vel earum maior pars consilii sanioris secundum deum et beati Augustini regulam providerint eligendam. Paci quoque et tranquillitati vestre paterna in posterum sollicitudine providere volentes auctoritate apostolica prohibemus, ut infra clausuras locorum seu grangiarum vestrarum nullus rapinam seu furtum facere, ignem apponere, sanguinem fundere, hominem temere capere vel interficere seu violentiam audeat exercere. Preterea omnes libertates et immunitates a predecessoribus nostris Romanis pontificibus ecclesie vestre concessas nec non libertates et exemptiones secularium exactionum, a regibus et principibus vel aliis fidelibus rationabiliter vobis indultas, auctoritate apostolica confirmamus et presentis scripti privilegio communimus. Decernimus ergo, ut nulli omnino hominum liceat prefatam ecclesiam temere perturbare aut eius possessiones auferre vel ablatas retinere, minuere seu quibuslibet vexationibus fatigare, set omnia integra conserventur earum, pro quarum gubernatione ac sustentatione concessa sunt, usibus omnimodis profutura, salva sedis apostolice auctoritate et diocesani episcopi canonica iustitia. Si qua igitur in futurum ecclesiastica secularisve persona, hanc nostre constitutionis paginam sciens, contra eam temere venire temptaverit, secundo tertiove commonita, nisi reatum suum congrua satisfactione correxerit, potestatis honorisque sui careat dignitate reamque se divino iudicio existere de perpetrata iniquitate cognoscat et a sacratissimo corpore ac sanguine dei et domini redemptoris nostri Ihesu Christi aliena fiat atque in extremo examine districte subiaceat ultioni. Cunctis autem eidem loco sua iura servantibus sit pax domini nostri Ihesu Christi, quatinus et hic fructum bone actionis percipiant et apud districtum iudicem premia eterne pacis invenia[n]t. Amen. Amen. Amen.

III

(*Rundzeichen.*)^a Ego Innocentius, catholice ecclesie episcopus, subscripsi.
(*Monogramm für Bene valet.*)

- + Ego Oto, Portuensis et sancte Rufine episcopus, subscripsi.
- + Ego Petrus, Albanensis episcopus, [subscripsi].
- + Ego Willelmus, Sabinensis episcopus, subscripsi.
- + Ego Odo, Tusculanus episcopus, subscripsi.
- + Ego Willelmus, basilice duodecim apostolorum presbyter cardinalis, subscripsi.
- + Ego frater Iohannes, tituli sancti Laurentii in Lucina presbyter cardinalis, subscripsi.
- + Ego frater Hugo, tituli sancte Sabine presbyter cardinalis, subscripsi.
- + Ego Octavianus, sancte Marie in via lata diaconus cardinalis, subscripsi.
- + Ego Petrus, sancti Georgii ad velum aureum diaconus cardinalis, subscripsi.
- + Ego Iohannes, sancti Nicolai in carcere Tulliano diaconus cardinalis, subscripsi.
- + Ego Willelmus, sancti Eustachii diaconus cardinalis, subscripsi.

Datum Lugduni per manum magistri Marini^b, sancte Romane ecclesie vicecancellarii, XIII^o. kalendas Iunii, indictione III., anno dominice incarnationis millesimo CC^o. XLV^o., pontificatus vero donni Innocentii pape quarti anno secundo.

—

Nach einer von der Kurie zu Konstanz den 8. April 1342 ausgefertigten und vidimierten Abschrift auf Pergament mit anhängendem Siegel.

^aMit dem Spruch *+ Notas fac michi, domine, vias vite.*

^bDie Abschrift liest unrichtig *Manni*. Allerdings führt AUGUST POTTHAST (HRSG.): *Regesta pontificum Romanorum inde ab anno post Christum natum MCXCVIII ad annum MCCCIV*, 2 Bde., Berlin 1874-75, Bd. 2, S. 1285, zweimal auch *Manni* als Datar des Papstes Innozenz IV. an.

Überlieferung und Publikationen

Lagerort:

HStA Stuttgart

Signatur/Titel des Originals:

B 462 U 1 und U 1 a

Überlieferung und Textkritik:

2 beglaubigte Abschriften auf Papier. Von der Konstanzer Kurie ausgefertigte und vidimierte Abschrift von 1342 April 8: HStA Stuttgart B 462 U 13.

Literatur:

Potthast: Regesta pontificum, Bd. 2, S. 1285.

Weitere Angaben

Sprache:

Lateinisch

Ausstellungsort:

Lyon

Aussteller:

Innozenz IV.; Papst

Ortsindex:

Alba, Piemont, Italien

Kirchberg Wohnplatz (12729)

Kirchberg, Sulz am Neckar, RW

Konstanz Wohnplatz (14442)

Konstanz, KN

Lyon, Dep. Rhône, Frankreich

Porto, Latium, Italien

Rom, Latium, Italien

Sabina

Santa Rufina, Latium, Italien

Toscolano, Lombardei, Italien